

Regional News Unit AIR Aizawl
Saturday, March 23, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Governor Dr Hari Babu Kambhampati an nimin khan Raj Bhavan Durbar Hall -ah Bihar Diwas a hmanpui.
- Mizoram Lok Sabha inthlan lo awm tura inbuatsaihna ngawrh taka kalpui a ni.
- Prime Minister Narendra Modi-a hnenah Bhutan ram civil mite chawimawina sang ber hlan a ni.
- UN Security Council-a Gaza-a inkahhai rawtna chu Russia leh China-in an veto hmanga an dodal avangin a tlawlh.



GOVERNOR

Governor Dr Hari Babu Kambhampati chuan Foundation day of Bihar (Bihar Diwas) chu nimin khan Raj Bhavan Durbar Hall -ah a hmanpui.

He hunah hian Governor chuan 'Bihar Diwas' hi Bihar state, Bengal Presidency nen a March 22, 1912-a then hran lawmna anih thu sawiin Bihar chu 1947-a India-in independence a neih hnu pawn Republic of India hnuai a awm chhonzawm zel thu a sawi. Bihar chu hemi hnuah hian thang nasain, India economy, culture leh politics-ah te a thawh hlawk thu a sawi a. Nalanda University-te, Buddha zirtirna hmun-Bodh Gaya-te awmna anih avangin India ram tan kum tam tak chung chu sakhua leh hriatna hmun pawimawh tak anih thu a sawi bawk.

Foundation day of Bihar (Bihar Diwas) hi sorkar laipui 'Ek Bharat Shrestha Bharat' programme hmalakna hnuai neih niin, India rama State leh Union Territory hnam zia impumkhatna chawisan nan a tih a ni. He programme hnuai hian Sawrkar chuan state hrang hrangte chu inhriatthiam tawna tuh anih theih nan mahni state hnam zia pho lan theihna hun a siamsak thin a ni.



LOK SABHA PREPARATIONS

Lok Sabha Inthlan awm tur atana inpuahchahna kal mekah nimin khan vote thlak inzirtirna kalpui dan tur sawiho a ni a, zirlai pawl, tlawmngai pawl leh kohhran te nen thawhhona kawng zawn ni se tih a ni.

Aizawl DC Conference Hall ah Aizawl District SVEEP (Systematic Voter's Education and Electiral Participation) Core Committee chu thukhawm in, vote tla zat tihpun a, vote thlak chungchanga inzirtirna kalpui dan sawi hovin SVEEP Nodal Officer Pi C. Laltleipuii, Director, SAU hovin an thukhawm a,

He meeting ah hian Mizoram in nikum kum 2023 a MLA inthlan a SVEEP hnuai hmalakna te thlirlet niin, tun Lok Sabha inthlan atana hmalakna turte sawiho a ni a. Thalai zinga vote thlak pawimawhna inhrilhhriat te, inthlan kalphung leh Dan leh hrai te inhrilhhriat chungchang leh Election Commission of India in inthlanna huapzo leh awlsamna a awm theih nan a ruahmanna hrang hrang a siamte chu mipui hriat atan zau zawka puanzar a pawimawhna leh bawhzui dan tur te an sawiho a ni.

Nimin vek khan State Media Cell for General Election to the Lok Sabha chu an chairman Dr H. Lianzela, Addl. CEO hovin an thukhawm a,

State Media Cell thukhawm hian Lok Sabha inthlanpui lo awm turah vote a tlak that theihna tura hmalak dan tur chi hrang hrang an duang a, NGO/Civil Society te bakah tlawmgai pawl, hnam bil zirlai pawl hrang hrang leh kohhran hrang hrang thlalai hruaitute nen thawhhona kawng zawn nise an ti a, hei bakah hian media te nena thawhho dan tur te, social media platform hrang hrang hman tangkai dan tur te leh mipui vantlang hnena zirtirna beihpui thlak dan tur te an sawiho a ni.



ZPM LS CANDIDATE FILES NOMINATION

ZPM Lok Sabha Candidate Pu Richard Vanlalmangaiha chuan nimin khan ZPM ticket-a ding turin Returning Officer, Aizawl DC Pi Nazuk Kumar-i hnenah a hming a thehlut.

Hming theh luhnaah hian Chief Minister Pu Lalduhoma leh ZPM Party President Pu Lalliansawta ten an tawiawm.

A hming a theh luh zawha chanchinbumite a kawmnaah Pu Richard Vanlalmangaiha chuan MP-a thlan tlin a nih chuan Mizoram hmasawna tur a tam thei ang ber ngaihtuah a tum thu a sawi a. An au hla ber tur chu Mizoram than zel nan ke an pen tur thu a ni dawn tih sawiin sawrkarin a duh anga a kalpui theih a ni dawn, a ti. A khingpui tur te chu mi fel tak an ni hlawm chungin nikum maiah mipuiin Mizoramah sawrkar thar, ZPM sawrkar an thlang chhuak a; mipuiin duh taka an thlan chhuah ZPM Candidate a nih avangin a tlin ngei a inbeisei thu a sawi ani.



MNF LOK SABHA CANDIDATE

MNF Party chuan Lok Sabha inthlana an candidate atan Rajya Sabha member ni lai Pu K. Vanlalvena an ruat.

MP Candidate tur hi nimin khan MNF Hnam Runah an Party President Pu Zoramthanga'n a puang a ni.

Pu K. Vanlalvena hi kum 2020 June thlaah Mizoram-in Rajya Sabha-a seat a neih chhun MP atan thlan tlin a ni a. Rajya Sabha MP a nih tan atanga kum thum leh a chanve chhungin Parliament Session-ah vawi 15 thu a sawi tawh a. Chung zinga vawi 13 chu Chairman remtihna a sawi a, vawi 2 dangte erawh Chairman-in a phal lo chungin Manipura Zo hnahtlakte thlang hauhna thu a auchhuahpui a ni. Parliament Session-ah zawhna puitling vawi 22 leh zawhna tenau vawi 40 vel a zawt tawh a ni.

Candidate puanna ah MNF President Pu Zoramthanga chuan Lok Sabha MP candidate chu Mizoram mipui aiawhtu leh thil tha tam tak titu a ni a ti a, Opposition atanga MP inthlan hmachhawn a huphurhawm tih sawiin theihtawp an chhuah dawn a ti bawk.

<><><>

MPCC PRESS CONFERENCE

Mizoram Pradesh Congress Committee Vice President Pu Lalnunmawia Chuaungo chuan Lok Sabha inthlan lo awm turah BJP khingpui lian ber annih avangin an party chuan Central ah beih a tawk nasa tih a sawi.

MPCC Vice President chuan nimin khan Aizawl Press Club ah thuthar thehdarhtute kawmin Congress chu Indian National Democratic Inclusive Alliance (INDIA) hruaitu leh opposition party lian ber a nih avangin Lok Sabha inthlan lo awm tura BJP kawng daltu lian ber a ni a ti a, kawng hrang hranga beih mek anni tih sawiin Income Tax Department leh Enforcement Directorate diklo taka hmanrua a hmangin Congress Party bank account 11 chu an ti tang a, heng Account a Cheng vaibelchhe 210 lai hrensak a nih bakah Congress Party in Bank Account-a pawisa an neih dang te pawh khawihchet theih lohva harsatna siamsak a ni a ti a. Lok Sabha inthlan lo awm tur a Congress Party inbuatsaihna chu Central-a BJP sawrkar duhthusam ang takin nasa taka tih khaih lak a ni tih a sawi bawk.

<><><>

MHSSP

Directorate of Health Auditorium-ah Health and Family Welfare Department hnuai Mizoram Health Systems Strengthening Project (MHSSP) buatsaih inrawnkhawm vawi 2-na nimin khan neih a ni a, a hmingah "Damna Kawl Eng" vuah a ni.

Inrawnkhawmnaah hian MHSSP hotute chuan he project thiltum zinga langsar zual chu vantlang hriselna lam enkawl na tur ruangam tha zawk te, a hun taka enkawl na pe thei tura inruahmanna te, health insurance scheme leh thawktu lam tihphuisui te a ni tih an sawi a. Mipuite hnena natna inkaichhawn theih loh chi langsar zual chungchang zirtirna uar zawka kalpuite, mipui hriselna tha zawk a awm theihna atana vantlang theihna hman tangkaite pawh an ngaipawimawh thu an sawi.

He hunah hian National Health Mission hotute, District hrang hrang Health Department aiawh te, MHSSP thawhpui pawl aiawhte, Lai, Chakma leh Bru hnam aiawhte, Mizoram University aiawh leh The World Bank team member-te an tel a ni.

<><><>

NE OLYMPIC GAMES

North East Olympic Games kelh mekah Mizoram chuan nizan thleng khan medal 47 an la tawh.

Nizan khan Wrestling huangah gold medal pahnih, silver medal pakhat leh bronze medal pathum a lak belh leh a ni.

Nimin tlai khan Mizoram hian Mipa Volleyball inelna huangah Manipur chu 3-0 a hnehin Gold Medal an lo hlawh chhuak tawh bawk.

Vawiin hian inel chhonzawm leh a ni dawn. Mipa football final-ah Mizoram leh Manipur an inkhel ang a, mipa basketball final-ah Mizoram an inlan dawn bawk a ni.

NE Games-ah hian state hrang hrang zinga hmahruai mektu chu Manipur niin medal 78 an la tawh, an hnuai hian a thlengtu Nagaland, Assam leh Mizoram ten an dawt a ni.

<><><>

PM MODI BECOMES 1ST FOREIGN HEAD TO BE BESTOWED WITH BHUTAN'S HIGHEST CIVILIAN AWARD ORDER OF THE DRUK GYALPO

Prime Minister Narendra Modi-a hnenah Bhutan ram civil mite chawimawina sang ber 'Order of the Druk Gyalpo' chu Bhutan lal Jigme Khesar Namgyel Wangchuck chuan nimin khan a hlan.

Chawimawina hlan a ni chu Narendra Modi-a chuan a tan ni ropui tak a nih thu a sawi a. Eng chawimawina pawh hi a hlu em em vek a, mahse, ram dang chawimawina han dawn nawlh mai hi chuan chumite ram pahnih chuan kawng dik an zawh a ni tih a puangzar a ni Prime Minister chuan a ti a. Chu chawimawina chu ama mimal hlawhtlinna a ni lova, India mi, mipui Vbch 140-te chawimawina a ni a ti a, India mipui zawng zawng ai-awhin chawimawina chu a pawm a, India mipuite aiawh bawkin lawmthu a sawi a ni a ti bawk.

Bhutan ramin Prime Minister hnena chawimawina an hlan ang hi an ram mi ni lo an hlan vawi khatna a ni.

<><><>

DELHI COURT REMANDS CM KEJRIWAL TO ED CUSTODY TILL MARCH 28 IN EXCISE POLICY CASE

Zu leh a khaihnawiha dan siam chungchanga thubuai (liquor policy case) chungchanga man Delhi Chief Minister Arvind Kejriwal-a chu Delhi Court chuan March ni 28 thleng Enforcement Directorate (ED) kuta awm rih turin a ti.

Nizan hmasa khan Delhi Chief Minister chu central probe agency chuan an man a. Nimin khan Rouse Avenue Courts-a Special CBI judge Kaveri Baweja chuan he thupek hi a chhuah a ni. Enforcement Directorate chuan Arvind Kejriwal-a chu ni 10 chhung kawl an dil a. Kejriwal-a chu Delhi liquor policy scam-a a khaipa ber a ni an ti a. ED chuan tuna liquor policy hnuhdawh leh chungchangah hian Kejriwal-a chu chiang takin a inrawlh a ni an ti bawk.

ED lamin Court-a an hruai laia chanchinbu mite zawhna chhangin AAP hruaitu Arvind Kejriwal-a chuan bang phen atang pawhin ram tan a thawh chhonzawm zel dawn tih a sawi a.

Man anih hnu khan Aam Aadmi Party lam pawhin Arvind Kejriwal-a chu Delhi Chief Minister a ni chhonzawm zel dawn an ti a. Enforcement Department chu Central-a rorel lai BJP politics hmanrua mai a ni an ti bawk.

<><><>

RUSSIA AND CHINA VETO U.S. RESOLUTION IN UNSC CALLING FOR IMMEDIATE CEASEFIRE IN GAZA

United States-in a put luh civil mite venhimna tur leh Palestinians tana tanpuina pek anih theihna tura Gaza-a inkahhai rawtna chu United Nations Security Council-a vote laknaah Russia leh China-in an veto hmangin an dodal.

Member 15 awmna UN Security Council-ah hian vote laknaah inkahhai duh 11 an awm a, member 3-in an dodal a, a eng lam lam mah vote lo member pakhat a awm a ni.

Nimin khan US Secretary of State Antony Blinken chuan Tel Aviv-ah Israel Prime Minister Benjamin Netanyahu chu a hmu a, hetah hian inkahhai turin a rawtpui a ni.

Hemi hma hian European Union chuan Israel leh Hamas indo mek inkahhai chu a lo rawt tawh bawk a. United Nations' Secretary-General António Guterres-a pawh Brussels-ah zinin European ram hruaitute chu inkahhai nawr turin a lo hmu tawh bawk a ni.

<><><>